

Los ntawm Thawj Tswj
Hwm Henry B. Eyring
Tus Pab Cuam thib Ib hauv
Thawj Pawg Thawj Tswj Hwm



Tej Koob Hmoov ntawm Ib Feem Kaum

Lub ntsiab ntawm qhov uas Vajtswv muab tej lus txib rau peb yog xav foom koob hmoov rau peb. Nws xav muab txoj sia nyob mus ib txhis, uas yog Nws lub txiaj ntsim zoo tshaj plaws, pub rau peb (saib D&C 14:7). Kom thiaj li yuav txais tau lub tsiaj ntsim uas yog nrog Nws nyob mus ib txhib ua ke nrog rau peb tsev neeg hauv lub nceeg vaj xilethi-aus, peb yuav tsum ua lub neej raws li tej kev cai ntawm lub nceeg vaj ntawd (saib D&C 88:22).

Nws twb tau muab tej lus txib rau peb hauv lub neej no lawm kom thiaj li pab tau peb ua li ntawd. Txoj kev cai them ib feem kaum yog ib txoj kev txib uas yuav pab npaj tau peb. Txoj kev cai hais tias peb yuav tsum muab ib feem kaum ntawm peb tej nyiaj txiag uas peb khwv tau pub rau tus Tswv no. Qhov no yooj yim heev uas ib tug me nyuam yeej to taub tau. Kuv yeej tau pom cov me nyuam yaus muab ib lub hnab ntawv uas muaj ib feem kaum ntawm cov nyiaj npib uas lawv tau los cev rau ib tug npiv sov.

Ib qho koob hmoov ntawm kev them ib feem kaum tag nrho yog qhov uas muaj siab ntseeg los ua lub neej nyob raws li ib txoj kev cai loj me ntsis. Kom thiaj li nyob tau rau hauv lub nceeg vaj xilethi-aus, peb yuav tsum ua neej raws li txoj kev cai fij siab. Qhov no txhais tau tias peb yuav tsum xav hais tias ntawm peb tus kheej

thiab tag nrho tej yam uas peb muaj yeej yog Vajtswv li tib si.

Qhov tsawg kawg yeej muaj li peb txoj kev uas yog thaum peb them ib feem kaum tag nrho hauv lub neej no ces yuav pab npaj peb los *xav* saib peb yuav tsum xav li cas es thiaj li txais tau lub txiaj ntsim ntawm txoj sia nyob mus ib txhis.

Qhov thib ib, thaum peb them ib feem kaum rau lub Koom Txoos, peb Leej Txiv Saum Ntuj Ceeb Tsheej yuav nchuav tej koob hmoov los rau peb. Leej twg uas tau rau siab them ib feem kaum tag nrho yeej paub hais tias qhov no muaj tseeb tiag. Tej koob hmoov qee zaum yog koob hmoov ntawm sab ntsuj plig thiab qee zaum yog ntawm sab cev nqaj daim tawv. Tej koob hmoov no yuav muab rau peb raws li tus Tswv lub sij hawm thiab raws li Nws txoj kev paub hais tias qhov twg yog qhov uas yuav zoo tshaj rau peb.

Thaum txais tej koob hmoov no, ces peb txoj kev ntseeg uas hais tias Vajtswv yog txhua yam zoo hauv lub neej no yuav loj tuaj. Ces yuav yooj yim heev rau peb pom tau hais tias txoj kev fij siab qhia qhov tseeb tias tag nrho tej uas Vajtswv tsim yeej yog Nws li. Qhov nov ua rau peb *yuav* zoo siab tias Nws tsuas hais kom peb muab ib feem kaum ntawm tej yam uas nws twb muab rau peb lawm xwb. Ces peb thiaj li npaj los ua lub neej

raws li txoj kev cai fij siab thaum uas yuav kom peb ua.

Qhov thib ob, peb txhua tus uas yeej rau siab them ib feem kaum tsis tu ncuu li *yuav* ua siab loj los thov Vajtswv kom muab tej yam uas peb los sis peb tsev neeg xav tau. Nws yeej tau cog lus tseg lawm hais tias Nws yuav muab koob hmoov ntau heev uas peb yuav txais tsis tas li yog tias peb muaj siab ntseeg ua raws li peb tej kev khi lus uas hais tias peb yuav them ib feem kaum (saib Malakis 3:10). Ib qho koob hmoov zoo heev ntawm ib feem kaum yog txoj kev ua siab loj txais tos tej uas yuav muaj los yam tom ntej. Txawm hais tias yuav muaj li cas los rau peb, los yeej yuav kawg rau qhov zoo. Thaum peb ua raws li peb tej lus cog tseg, ces Nws yuav ua raws li Nws tej lus cog tseg. Qhov uas nyob nyab xeeb yog ib qho koob hmoov zoo heev ntawm kev them ib feem kaum tag nrho. Cov uas tau ua raws li zaj lus txib ntawm ib feem kaum yeej uas tau tim khawv hais tias kev nyob nyab xeeb yeej muaj tseeb tiag thiab tseem ceeb heev.

Qhov thib peb, cov uas them ib feem kaum *yeej pom tau* lawv txoj kev hlub rau Vajtswv thiab Vajtswv cov me nyuam loj tuaj. Qhov uas txoj kev hlub loj tuaj no yog kev to taub hais tias Leej Txiv siv tej nyiaj ib feem kaum uas peb them los pab cov neeg hauv lub ntiat teb no thiab nyob mus ib txhis.

Los ntawm Nws cov tub qhe uas muaj cai, Nws ua tib zoo siv cov nyiaj ib feem kaum. Tus them ib feem kaum pab tus Tswv txhim tsa cov tuam tsev, uas muab tej tsev neeg sib khi ua ke nyob mus ib txhis. Tus them ib feem kaum pab Nws xa txoj moo zoo mus rau cov neeg nyob txhua qhov txhia chaw. Tus them ib feem kaum pab Nws pub cov neeg tshaib plab thiab cov uas raug kev txom nyem raws li Nws cov tub qhe pom tias yuav pab li cas. Cov tub qhe ntawd ib tug twg yuav qhia tau nej saib muaj kev hlub ntau dua vim yog siv cov nyiaj ib feem kaum pab foom koob hmoov rau lwm tus neeg. Thiab tus uas rau rau siab them ib feem kaum yuav qhia tau li no thiab.

Lub sij hawm sib hais haum txog txoj kev them ib feem kaum tseem nyob ob peb lub hli tom ntej. Kuv thov Vajtswv kom nej thiab nej tsev neeg yuav pib tam sim no kom khwv tswv yim thiab npaj ua ib lub neej uas tsim nyog txais tej koob hmoov uas Vajtswv nchuav los rau tag nrho lawv cov uas hais tau rau Nws hais tias lawv them ib feem kaum tag nrho.

QHIA LOS NTAWM TSAB XOY NO

- Qee zaum qhov kev qhia ib txoj ntsiab cai twg zoo tshaj yog kom ua rau sawv daws tau pom (saib *Teaching, No Greater Call* [1999], 164). Xav saib puas tsim nyog hais kom tsev neeg ib tug neeg ua kom sawv daws tau pom ib feem kaum yog npaum li cas. Nws ua kom sawv daws tau pom thaum nws muab ib yam tshem tawm ntawm kaum yam. Kom thiaj xaus lus, xav saib puas tsim nyog caw tsev neeg ib tug neeg los qhia saib yus ua li cas sau ntawv rau ib daim ntawv them nyiaj ib feem kaum.
- “Cov neeg uas nej qhia yuav tau kev pab los ntawm qhov uas sawv daws sib koom kawm” (*Teaching, No Greater Call*, 63). Caw tsev neeg los qhia saib lawv xav hais tias Thawj Tswj Hwm Eyring txhais li cas thaum nws hais tias “xav saib peb yuav tsum xav li cas es thiaj li txais tau lub txiaj ntsim ntawm txoj sia nyob mus ib txhis.” Xav saib puas tsim nyog sib tham txog peb txoj kev uas txoj kev them ib feem kaum npaj peb xav tej yam uas peb yuav tsum xav hauv nruab siab kom thiaj txais tau Vajtswv tej koob hmoov.

COV HLUAS

Nyiaj Txiag Txaus

Los ntawm Fabiano dos Santos da Silva

Kuv tau ntsib cov tub txib thaum kuv muaj hnuv nyooog 17 xyoo. Thaum ntawd kuv tus tij laug thiab kuv nyob ua ke. Xyoo ua ntej ntawd, wb niam tau tas sim neej, thiab wb lub neej kuj nyuaj kawg. Thaum ob tug tub txib qhia kuv, kuv pom tau hais tias lub Koom Txoos yog lub koom txoos uas kuv ib txwm nrhiav kom tau koom. Tiam sis qhov uas kuv cov phooj ywg pheej yaum kom kuv mus ua lwm yam tab kaum kuv es kuv thiaj tsis mus rau lub koom txoos thaum hnuv Sunday.

Muaj ib zaug kuv tau mus koom lub Koom Txoos ib yam ntxim saib ntxim ua thaum tsis yog hnuv vas xaum vas thiv. Thaum kuv pom tag nrho cov tub hluas ntxhais hluas luag nyav thiab ua si ua ke, qhov ntawd ua rau kuv xyiv fab heev. Cov tub txib, nrog rau cov hluas siv lub cib fim ntau los qhia txoj moo zoo rau kuv, thiab ua rau kuv zoo siab heev ces kuv thiaj li los ua kev cai raus dej.

Tab sis txawm tom qab kuv tau los koom lub Koom Txoos lawm, los kuv tseem muaj kev cov nyom thiab. Kuv yog tib tug mej zeej ntawm lub Koom Txoos uas nyob rau hauv lub zos no ces lub tsev sib ntsib nyob deb heev ntawm kuv. Kuv cov phooj ywg uas tsis yog mej zeej tsis nyiam kuv lawm. Thaum kuv nyob kuv ib leeg xwb, kuv thov Vajtswv thiab hnov tau tus Tswv txoj kev hlub.

Txhua hli, kuv tau txais me ntsis nyiaj ntawm cov nyiaj uas kuv niam muab cia rau kuv xwb. Yeej nyuab heev los txhawb nqa kuv tus kheej vim cov nyiaj tsawg heev. Tab sis kuv yeej xav ua tus neeg mloog lus. Kuv them ib feem kaum thiab them nqi tsheb mus kawm vaj lug kub thiab mus koom kev sib ntsib rau hnuv Sunday. Kuv tsis to taub, hais tias ua cas thaum hlis tag lawm, kuv ho muaj nyiaj txaus los them txhua yam thiab.

Kuv yeej paub hais tias kuv tau koob hmoov vim kuv them ib feem kaum. Qhov uas kuv ua raws li lo lus txib

no pab kuv zaj lus tim khawv muaj zog tuaj, mus ua tau ib tub txib, thiab paub txog tej koob hmoov kom kuv thiaj li pab tau cov mej zeej tshiab thaum lawv muaj kev cov nyom.

COV ME NYUAM

Kuv Yeej Them tau Ib Feem Kaum

Them ib feem kaum txhais tau hais tias muab 10 feem pua ntawm tej uas peb muaj rau tus Tswv. Xav txog peb tus me nyuam uas nyias muaj nyias ib txog hauj lawm ua. Kwv yees tias ib tug ua hauj lwm tau \$1, ib ho ua tau \$2, thiab tus thib peb ua tau \$3. Sau tseg saib ib tug me nyuam yuav tsum them ib feem kaum li cas.

Lo lus nug phij xej: Ntawm cov neeg them ib feem kaum no tus twg yuav tau koob hmoov ntau tshaj? (Kev pab: Saib ob peb kab lus kawg ntawm Thawj Tswj Hwm Eyring zaj lus.)



Kev Ntseeg • Tsev Neeg • Kev Pab

Ntxiv Dag Zog rau tej Tsev Neeg ntawm Cev Nqaij Daim Tawv los ntawm Kev Vam Khom Yus tus Kheej

Ua tib zoo kawm tej ntaub ntawv no thiab, raus li qhov tsim nyog, nrog cov viv ncaus uas koj mus xyuas siab tham txog tej no. Siv cov lus nug kom pab ntxiv dag zog rau koj cov viv ncaus thiab kom thiaj nruab tau lub Koom Haum Niam Tsev tej kev coj ua rau hauv koj lub neej.

Ua kom muaj kev vam khom yus tus kheej —qhov uas peb pab tau peb tus kheej thiab peb tsev neeg—yuav yog txhua tus viv ncaus lub luag hauj lwm. Peb yuav vam khom tau peb tus kheej thaum peb nyiam ua hauj lwm, thaum peb nrhiav kev tshooj siab los nrhiav kom tau qhov zoo tshaj plaws los pab peb tus kheej, thiab thaum peb rau siab pab cov neeg hauv peb tsev neeg los nrhiav tau tej yam uas lawv toob kas.

Thaum peb vam khom tau peb tus kheej, ces peb yuav siv peb tej koob hmoov thiab tej yam uas peb muaj los npaj thiab tiv thaiv kom tsis txhob muaj teeb meem. Tab sis, kev vam khom peb tus kheej, yuav zoo dua tuaj thaum peb thov Vajtswv kom muaj lub siab loj thiab muaj kev ntseeg thaum peb ntsib tej teeb meem uas yeej yuav los rau peb. Kev vam khom peb tus kheej kuj yuav pab peb ua raws li peb tej kev khi lus uas hais tias peb yuav pab saib xyuas lwm tus neeg.

Tej ntsiab cai thiab tej kev txawj ua ntawm kev vam khom peb tus kheej twb tau qhia rau peb hauv lub Koom Haum Niam Tsev lawm. Cov viv ncaus yeej kawm tau txog kev saib xyuas nyiaj txiag, kev tsis txhob tiv nuj nqis, kev kawm ua hauj lwm, tej vaj lug kub thiab txoj

moo zoo, kev qhia lwm tus neeg kom txawj nyeem ntawv thiab txawj kawm ntawv, kev siv tshuab khoom (technology), kev noj qab nyob zoo ntawm lub cev, kev tswj kom tsis txhob muaj yees thiab kev kho kom zoo, kev tswj kom tsis txhob muaj mob, kev ua vaj zaub, kev ua zaub mov thiab ntim tej zaub mov cia, kev npaj rau kev kam ceev, thiab ntau yam ntxiv kom thiaj li pab peb los muaj kev vam khom peb tus kheej.¹

Julie B. Beck, lub Koom Haum Niam Tsev tus Thawj Tswj Hwm, piav hais tias “kev pab peb tus kheej thiab pab lwm tus neeg qhia tau hais tias peb yog tus Tswv Yexus Khetos cov thwj tim. . . . Thaum [kuv niam pog] tau tag sim neej no tsaib no, yeej muaj tim khawv qhia tau tias nws yog ib tug neeg vam khom tau nws tus kheej hauv lub neej. Nws muaj daim ntawv tso cai nkag tuam tsev uas tseem siv tau thiab nws tej vaj lug kub thiab tej ntawv qhia yeej qub tag vim nws siv ntau heev. Peb ua tib zoo muab tej lauj kaub, yias, thiab tais diav uas nws tau siv los ua ntau ntau pluas mov sib faib. Nws tso nws tej pam rwb uas nws siv tej qub ntaub los ua rau peb. Nws ntseeg raws li tej laus hais uas hais tias, ‘siv ntag, rau siab siv kom qub, siv kom tau, los

sis tsis txhob yuav li.’ Peb pom tej khoom noj uas nws cog tau, npaj zoo zoo cia, thiab khaws cia. Qhov uas ua rau peb nco nws tshaj yog nws phau me nyuam ntawv uas nws rau siab ntso sau tseg txog tej nyiaj uas nws siv. Vim nws ua neej raws li lub tswv yim zoo es npaj rau lwm hnuv tom ntej, nws tseg me ntsis nyiaj npaj cia rau tej xwm txheej, thiab nws tsis tshuav leej twg nqi hlo li! Qhov tseem ceeb tshaj, nws tau qhia thiab tshoov neeg coob tug lub siab kom kawm tau tej txuj ci uas nws tau kawm siv hauv nws lub neej coj ruaj nrees.”²

Los ntawm cov Vaj Lug Kub

Yauhas 13:34–35; Yaukaunpaus 1:27; Mauxiyas 4:26; Doctrine and Covenants 29:34–35; 38:30; 44:6

Los ntawm Peb zaj Keeb Kwm

Lub Koom Haum Niam Tsev cov viv ncaus yeej los tau koom ua tej hauj lwm cawm neeg txoj sia, txawm yog nyob ntawm lawv lub cev nqaij daim tawv los yog lawv sab ntsuj plig los xij. Txhua lub lis piam thaum Nauvoo lub Koom Haum Niam Tsev sib ntsib, cov viv ncaus nyias qhia nyias txog cov neeg uas xav tau kev pab. Ces lawv tau muab lawv tej nyiaj, tej khoom, tej txuj ci, thiab tej sij hawm pub rau cov neeg uas

xav tau kev pab. Ces ib tiam dhau ib tiam lub ntsiab hauj lwm ntawm lub Koom Haum Niam Tsev yog txoj kev daws tej kev txom nyem li no.

Thaum cov Ntseeg nyuam qhuav tuaj txog lub hav Salt Lake, Thawj Tswj Hwm Brigham Young (1801–77) tau ntuas lub koom haum niam tsev kom pab cov neeg uas xav tau kev pab thiab kom kawm tej txuj ci

uas yuav cia lawv saib xyuas thiab tu lawv tus kheej. Nws hais tias, “Cia li kawm txhawb nqa nej tus kheej; muab tej txhuv nplej thiab tej hmoov nplej tseg cia, thiab npaj rau hnuv uas tsis muaj.”³ Raws li lub pov thawj hwj tej kev coj, lub Koom Haum Niam Tsev yeej meem qhia kom sawv daws vam khom lawv tus kheej, tiv thaiv lawv tsev neeg,

thiab yaum kom sawv daws coj ncaj ncees thiab ua tej yam zoo rau lwm tus neeg vim yog kev siab hlub, twb yog tus Khetos txoj kev siab hlub dawb huv.

LUS CIM

1. Saib *Handbook 2: Administering the Church* (2010), 9.4.2.
2. Julie B. Beck, “The Welfare Responsibilities of the Relief Society President,” *Basic Principles of Welfare and Self-Reliance* (2009), 6.
3. *Teachings of Presidents of the Church: Brigham Young* (1997), 231.

1. Kuv yuav ua li cas pab kuv cov viv ncaus thiab lawv tsev neeg ua tej yam uas yuav pab lawv vam khom lawv tus kheej rau ntawm sab cev nqaij daim tawv zoo dua tuaj?

2. Kuv yuav ua li cas pab kuv tus kheej ua tej yam uas yuav pab kuv vam khom kuv tus kheej rau ntawm sab cev nqaij daim tawv zoo dua tuaj?

Kom tau ntaub ntawv xov xwm ntxiv, cia li txuas rau www.reliefsociety.lds.org.